

Gotholengoque, Manerbio, Pontevico, ac plerisque aliis oppidulis voluntaria deditione receptis, Abdua ad Ripaltam ponte superato, Veneta arma Leonessii ductu Mediolanum usque pervenere; facta namque spes erat per exules, fore ut, si Venetæ copiae eo admotæ essent, populus omnino aliquid in urbe moveret; sed ad Venetorum conspectum, quanquam in suburbana tecta expediti equites irrupissent, nullus motus est secutus. Nec multo post Venetus castra Soncinum admovit, cujus muros bellicis machinis adortus, attentissima urgere cæperat obsidione. Ad eam solvendam nova hostis via ingressus, cum viginti millibus hominum in Brixensem agrum, Ollio ad Cannedulum superato, erupit, Gammariaque subito incurfu capta, Pontemvicum obsidione adortur. Veneti duces, disiectis Soncini mœnibus, oppidanos ad deditionem compellunt: inde Romenengio potiti, ad hostem ire pergunt. Receperat interim ille Pontemvicum, qui in Ollii ripa est; concesseratque ad Agellum, unde Brixiam ex propinquo infestaret. Leonessius & ipse non procul ab hoste opportunissimo loco metatus, paludis angustias occupat: his locis sæpius vario eventu pugnatum. Erant in utrisque castris copiae omnino ingentes: Venetis ad quindecim equitum millia ac sex peditum: in Sforcianis tria peditum, equitum vero ad octo & decem millia. Quidam annales habent, sub id tempus & ad Porcianum oppidum tribus & amplius horis atroci Marte dimicatum, duplicemque cladem utrinque acceptam; sed equorum, ob loci difficultates, omnino maiorem quam hominum: fuissetque fortassis usque ad victoriam alterius partis dimicatum, nisi, fortuna adhuc neutro inclinante, atrox pugna noctis interventu dirempta esset. Hæc circa Abduam gerebantur: quum Guilielmus Monferratenensis cum quatuor millibus equitum in Alexandrinum agrum tumultuose erupit, inde Derthonensem Ticinensemque ingressus, omnia terroris & populationis complevit. Ad illius conatus inhibendos Sacromor Vicecomes, & Antonellus Burgenfis & Sforcia missi, hostem tumultuario prælio Alexandrinis fini-

*Pugna
atrox Vene-
torum cum
Sforcia.*